

NM i friidrett 2018  
Breimsbygda idrettslag  
v/Rolf Kjetil Egge  
6826 Byrkjelo

Byrkjelo 10. september 2017

Sogn og Fjordane Fylkeskommune  
Askedalen 2  
6863 Leikanger

**Norsk meisterskap i friidrett, presentasjon av lokal matproduksjon, foredrag «Spis smart» for unge, foreldre, trenarar og leiarar i fylket. Omdømebygging og marknadsføring av Sogn og Fjordane.**

*NM i friidrett som vert arrangert på Byrkjelo 17. -19. august 2018 er som eit kinderegg, ikkje fordi vi som arrangør «MÅ» gjere det slik, men fordi vi ser NM i friidrett som ein unik mulighet å vise fram nokre av våre flotte verdiar for alle tilreisande og samtidig setje langvarige fotavtrykk i eige fylke.*

### **Norsk friidrett i medvind**

Når heile den norske friidrettseliten passerar fylkesgrensene i august 2018 er det med forvissing om at det skal utøvast prestasjonar i topp nasjonal og internasjonal klasse, mellom høge fjell, vakre dalar og djupe fjordar.

Byrkjelo og Sogn og Fjordane er kjent for høg kvalitet både på det sportslege arrangementet, men også det å legge til rette for alt som skjer utanfor bana, dette ønskjer vi å bygge vidare på også i 2018. NM i friidrett 2018 skal vere ei god totaloppleving – og ei oppleving for alle sansar!

Flotte, sympatiske og utåtvente profilar som Karsten Warholm, Ingebrigsten-brødrene, Isabell Pedersen og Amalie Luel, vil trekkje all merksemd i eit idrettsinteressert presse-Norge til fjordfylket desse dagane, denne sjansen må vi nytte maksimalt.

NM i friidrett er lagt ei veke etter EM i Berlin, så denne sommaren er det i Berlin og på Byrkjelo det skjer! Alle dei beste utøvarane stiller, i tillegg til mange lokale talent frå Sogn og Fjordane som heilt sikkert vil gjere sitt for at edelt metall bli att på heimebane!

### **Lokalmat- og friidrettsfestival**

«Sunn idrettsmat» er blitt eit nasjonalt omgrep, ingen har tidlegare vore flinkare til dette enn under store stemner på Byrkjelo, og vi er langt på veg malen for dette. No ønskjer vi å gjere dette enda tydelegare og betre.

Under NM vil vi som arrangør ha eit stort serveringstelt med plass til over 300 gjester, dette teltet ligg heilt inn til stadion og er ein viktig del av arrangementet. Eit NM i friidrett går over tre langer dagar, og behovet for tilgang på matsservering er viktig. Vi legg stor vekt på å servere sunn, god og

kortreist mat. Dette fell i smak både blant utøvarar som skal prestere og andre som besøkjer arrangementet og skal kose seg.

Med 5 – 6000 publikummarar på tre dagar er det mykje folk innom Byrkjelo desse dagane for å sjå og oppleve idrett av topp klasse, dette gjev ein unik muligheit å vise fram anna som vi er gode på. Byrkjelo og Sogn og Fjordane er «senter for lokalmat», med Bakar Jon som eit nasjonalt kjent fenomen, ein kombinasjon som gjer det perfekt å arrangere «lokalmat- og friidrettsfestival».

Lokalmatfestivalen, samlokalisert med NM i friidrett, vil vere eit fantastisk utstillingsvindaug for tital med lokale råvareprodusentar. NM i friidrett vil trekkje folk til ein lokalmatfestival og vise versa – og vi får vist fram mykje meir av det flotte vi skaper i Sogn og Fjordane til mange fleire!

Med smaksprøver på kjekjøtt, lokalproduserte ostar, kortreist fisk, saft og sylte, vil NM i friidrett bli ei eksotisk Sogn og Fjordane-oppleving for alle tilreisande. Vi vil stadfeste fylket sin posisjon som dyktig arrangør av store meisterskap, men også produsent og leverandør av fantastiske matprodukt.

### **Sunn idrettsmat**

Ein viktig del av det å ta på seg slike store arrangement som eit NM i friidrett er, er og å gje noko tilbake til området som arrangerer. Både gjennom økonomisk overskot som betaling for den store dugnadsinnsatsen som blir lagt ned, men også gjennom varige fotavtrykk som rollemodell for born og unge.

Gjennom «Kongle-NM» i friidrett med sunn matpakke, mjølk og frukt, får over 300 born delta på ein heilt eigen friidrettsdag. Dette er idretts glede som må opplevast, det er smil, latter og aktivitet i ein heil dag! Kanskje møter ein ei verdsstjerne eller to!

Sunn idrettsmat har utgangspunkt i Norges idrettsforbund og med Norges friidrettsforbund som ein viktig medspelar. Vi ser at eit NM i friidrett til Sogn og Fjordane, kan vere ein motor og drivkraft for å få dette viktige budskapet ut til fleire. Sunn mat er ikkje viktig berre for å drive idrett, men for å prestere i alle samanhengar i skule og fritid.

Konseptet «Spis smart» ønskjer vi å knyte opp mot NM i friidrett og kunne reise rundt til fleire vidaregåande skular i fylket og presentere enten før eller etter NM (Sidan NM er siste helga av skuleferien, må opplegg gjennomførast utanom sjølve NM-veka). Hovudmålgruppa er 13-18 år, men svært aktuelt også for foreldre, trenarar og leiarar, det er viktige tema som blir teke opp. Ungdommar til og med 18 år får gratis inngang på stadion under NM som ein del av dette.

Under ein av NM dagane vil vi invitere til «Spis smart» seminar på stadion, der alle som ønskjer å kome er invitert. Det blir foredrag, sunn mat med kortreiste råvarer og gratis inngang på NM i friidrett for dei som deltek.

### **Marknadsføring av Sogn og Fjordane**

Norsk friidrett «spring» i sterkare medvind enn på mange tiår. Med Karsten Warholm vil «halve Sunnmøre» komme til Byrkjelo under NM. Men NM i friidrett er ikkje berre for dei som kjem for å oppleve det «live», Sogn og Fjordane vil vere i media sitt søkelys i mange dagar både før under og etter stemnedagane, både med NRK fjernsyn som sender i 3 dagar og skrivande presse.

Ein lokalmatfestival i kombinasjon med friidrett vil gje mange nye og spennande vinklingar for dei som skal rapportere heim frå NM.

I tillegg produserer vi som arrangør eige Web-TV som blir sendt direkte i 3 heile dagar, dette blir følgt av tusenvis over heile landet. Her vil vi nytte muligheita å vise fram mykje av det flotte vi har å by på, frå Hoven i Loen, Kjerringa og Stad til Briksdalsbreen og Eggenipa. Inge skal vere i tvil om kvar NM i friidrett er arrangert og mange skal ha lyst å reise hit også etterpå!

### **Applaus og støtte**

Som arrangør er vi ikkje plikta å gjere meir ut av eit NM enn å legge til rette på «indre bane» og det tekniske som er direkte retta mot arrangementet. Då er det få som hugsar oss når dørene stengjer.

Vi legg stor innsats, ære og flid i å vise både Byrkjelo, Gloppen og Sogn og Fjordane frå si beste side.

Om lag 10 000 dugnadstimar blir lagt ned for at dette skal bli den suksessen vi håpar og trur, ein innsats som vi håpar skal betale seg ved å kunne gje noko tilbake til lag og organisasjonar som står bak dette, og som skal halde fram arbeidet med å gjere Sogn og Fjordane til ein god stad å vekse opp, leve og bu.

Det kostar sjølvsagt å legge ned så mykje innsats på frivillig basis, til dette treng vi entusiasme både lokalt og regionalt, eit klapp på skuldra og litt applaus, men også økonomisk støtte.

Eit NM i friidrett er etter kvart blitt eit stort arrangement, med store krav til teknisk tilrettelegging. Vi har Norges vakraste friidrettsarena, men lite faste tekniske installasjonar, desse må leigast inn til NM. Dette er både storskjerm og lyd på stadion, det er tilrettelegging og produksjon av Web-TV, fasilitetar for servering og renovasjon, og eit stort teknisk opplegg for å handtere og publisere alle resultat på ein rask og effektiv måte.

Så kjem kostnader knytt til marknadsføring og andre arrangementskostnader på toppen av dette, som mellom anna behov for å investere i stavmatte på Byrkjelo stadion (Sogn og Fjordane har per i dag ingen godkjende stavmatter for slike arrangement, noko som og fører til at aktive i fylket må reise ut for å trene og rekrutteringa blir fråverande).

NM i friidrett 2018 har pr. dato eit budsjett på om lag 2,1 MNOK. Når vi måla på inntektsida er det budsjettert med eit overskot på 250 000 kroner, som er dugnadskompensasjon for innsatsen som blir lagt ned. I tillegg er det budsjettert med utbetaling av dugnadskompensasjon til andre lag i Gloppen, Jølster og Stryn med 100 000 kroner.

Sponsormarknaden er usikker og langt tøffare enn tidlegare. For å sikre økonomien i arrangementet er det difor viktig at det offentlege (kommune og fylkeskommune) stiller på når ein får slike store viktige arrangement til fylket, og løftar det opp og fram saman med private sponorar og samarbeidspartnarar.

Vi søker Sogn og Fjordane Fylkeskommune om eit tilskot til NM i friidrett på kroner 347 110, fordelt på denne måten:

- 310 000 kroner (støtte til arrangement)
- 37 110 kroner (støtte til investering utstyr)

- Vi er rimeleg sikre på at vi gjennom dei aktivitetane vi planlegg, skal gje god valuta for pengane og vise fram fylket, verdiar vi står for og fantastiske lokale ressursar, på ein framifrå måte.

Støtte frå Sogn og Fjordane Fylkeskommune vil i si heilheit, direkte bli nytta til marknadsføring av arrangementa, gjennomføring av lokalmatfestival, presentasjon av «Sunn idrettsmat/Spis sunt», investering i utstyr det er stort behov for i fylket og teknisk gjennomføring av NM i friidrett.

Vennleg helsing  
NM i friidrett 2018  
Rolf Kjetil Egge  
Leiar hovud komité  
Mobil 411 63 394  
[Rolf.egge@gmail.com](mailto:Rolf.egge@gmail.com)

*Vedlegg:*

- budsjett for NM i friidrett 2018
- presentasjon av NM i friidrett 2018